



UKA 2017/38

13/11-2017

Randi Vestergaard Evaldsen

**Uunga siunnersuut: Aningaasarsianit akileraarutit pillugit Inatsisartut inatsisaata allanngortinneqarnera pillugu Inatsisartut inatsisaat nr. xx, xx. xxx 2017-imeersoq (Soraarnerussutisiaqalernissamut aningaasaatit Kalaallit Nunaanni angerlarsimaffeqartut akileraaruserneqartarnerat, soraarnerussutisiassanit naafferartumik annertoqqatigiimmik tunniunneqartartussanit soraarnerussutisiassanik nuussineq, akileraarutitigut sumut attuumassuteqarnermut tunngasut aamma avataaneersunut sulisussanut, Namminersorlutik Oqartussat sinnerlugit mittarfiliassanik suliaqartunut, ilanngaasiinneginnemi akileraarutitut aaqqissuussineq)**

(Aningaasaqarnermut Akileraartarnermullu Naalakkersuisoq for Finanser og Skatter)

(Siullermeerneqarnera)

Siullermik Demokraatiniit oqaatigissavarput akueriuminaalluinnarmat inatsisip matuma tuaviusukaaginnaq suliarineqassammat, taamatut suliaqarneq siullermiinngilaq. Inatsimmut pappiaqqat tigoqqammerpagut. Ullumi siullermiissavarput tamatumalu kingorna ataatsimiititaliaq ullup ataasiinnaap ingerlanerani siunnersuut oqaluserissavaaa isumaliutissiisummillu allalluni. Tamanna ajorpoq, ajorluinnarpoq.

Tupinnanngilaq taamatut piffissakilluta pikatattumik sulinerup kinguneranik kukkunissaq qaninnerussammat aammalu eqqumaffissat allat arajutsineqarsinnaammata. Taamaattumik Demokraatiniit Aningaasaqarnermut Akileraarutinullu Naalakkersuisoq sakkortuumik isornartorsiorusupparput. Ajorpoq taamatut Inatsisartut sulineranni atugaqartitsineq. Imminissarsiorneruvoq kusanaallunilu.

Aningaasaqarnermut Akileraartarnermullu Naalakkersuisoq sakkortuumik kaammattussavarput pingaarnersiullaqqinneruleqqullugu pilersaarusiullaqqinneruleqqullugulu.

Taamatulli oqareerluta Demokraatiniit pingaarnertigut isumaqataavugut pitsaasuummat angisuunik



mittarfiliornissamut nunatta nammineerluni sapinngisamik amerlanerpaanik aningaasanik pissarsiniarnissaa. Aningaasarsiornermi ataatsimut tamaat isigalugu amerlanerpaanik aningaasanik nammineq pissarsigutta taarsigassarsiassagut avataaneersullu aningaasaliissutissaat ikinnerussapput taavalu aamma suliat imminut akilersinnaanerit peqataanik annerussaaq. Allaqqussinnaanngilaq.

taamaattorli tassani Naalackersuisut tikkuuqqittariaqarpagut: Sooruna ilisimatinneqarneq ajortugut Kalaallit Airports A/S-p suliaasa sumut killissimanera pillugu? Aperisarpugut akineqassanatali. Sooruna paasitinneqarneq ajortugut avataaniit aningaasaliissarsiornerup sumut killissimanera pillugu? Apereqattaarpugut akineqarnerli ajorpugut.

Siunnersuutip imaanut tunngatillugu tamakkiisumik akileraarutissamut tunngasortaa qiviassagutsigu periuseq aatsitassarsiornermi ullumikkut atorneqarsinnaasumut periarfissaareersumut assiguvoq. Demokraatiniit akileraarusersueriaaseq taamaattoq aporfissaqartinnngilarput, sanaartornerup nalaani suligallartussat tunngaviusumik kommunimi kiffartuunneqarnissamut periarfissanik atuisussaannngimmata. Oqaatigerusupparali periutsit imminnut assigugaluartut pineqarmata immikkoortut marluk imminnut eqqaanannngilluinnartuummata. Aatsitassarsiornermi eqqarsaatigineqarpoq suliarlut illoqarfii up ungataani najugaqartussatut naatsorsuussaammata, taamaattumik pisortat kommunillu kiffartuussinerannut artukkarsuutaasussaannngillat. Matumanili eqqartorparput illoqarfinni annerni timmisartunut sulusalinnut mittarfiliornissaq - taamaattumik sanaartortussat Ilulissani, Nuummi Qaqortumilu najugaqartussaassapput taamaattumillu naatsorsuutiginnngitsoorsinnaannngilarput kommunimi neqeroorutinik atuisarnissaat.

Tassanilu pingaaruteqarpoq ersarissunik paasiuminartunillu malittarisassaqaarnissaa qanoq ilinerani suliarallartutut isigineqartarnissaq. Assersuutigalugu ilaqquttat nassarsimangaanni maanga taava qitornat atuartariaqassapput meeqqerivinniillutilluunniit taamaalippat kommunimi sulliviit kommunimilu sulisut atorneqartariaqassapput taamatullu pisoqartillugu Demokraatiniit isumaqarpugut tamakkiisumik akileraartarneq pillugu aqqissuussinermut ilaatinneqarsinnaassannngitsut. Taamaattumik inatsimmi arlallit eqqarsaatigeqqissaartariaqassapput pilersarusiorneqarlutillu. Taamaattumuna tupigikujukkippat manna inatsit imartoorsuaq taama sivikitsigisup iluani suliaritinniarneqarmat, apeqqutissaqarpugummi paaseqqissaarusutatsinnik.



Taamatullu aamma erseqqissaassutigerusupparput Naalakkersuisut imminnut pisussaaffilermata timmisartunut sulusalinnut mittarfiliortiternerit aappaagu aallartissallugit taamaangippat missingersuutit eqquutsinneqarsinnaassanngimmata. Taamaattumik periarfissaq manna atorlugu Naalakkersuisut apererusuppakka Kangerlussuaq Narsarsuarlu suniarneqarnersut? Sisimiuneersunik ataatsimeeqateqarpugut saqqummiisunik suliamut "Sikumiut"-nut tunngasunik. Suliami tassani pinngitsoorneqarsinnaanngilaq Kangerlussuarmi mittarfik, taamaattumik Qeqqani innuttaasut sinnerlugit paaserusupparput, Kangerlussuaq pillugu pilersaarutit suunersut? Apeqqut paatsuugassaangilaq: Kangerlussuaq matuneqassamaarpa, atornikinnerulissava imaluunniit iluarsiiissut allarlunnaassava?

Siunnersuummi akitsuutitigut iluanaarummut tunngasortaa pilersussaq PFA Soraarnermiit Danmarkimi PFA Pensionimut nuussineq pissutigalugu, taava Naalakkersuisut inatsisissatut siunnersuusiaanni pappiaqqanilu tassunga tunngassuteqartuni allassimasunut naleqqiullugu pissutissaqanngilagut Naalakkersuisunit allaanerusumik isummissalluta.

Isumaqarpugut apeqqutit arlallit allallu itisilerneqartariaqartut. Paasereerparput suliarinissaanut piffissaqarpiarata taamaattumik kaammattuutigissuarput matuma inatsisip pingaaruteqaqisup aappassaaneernissaa pingajussaaneernissaalu aatsaat 2018-mi Upernaakkut Ataatsimiinnermi suliarineqassasut.

Taamatut oqaaseqarluta siunnersuut Aningaasaqarnermut Akileraartarnermullu Ataatsimiititaliamut innersuupparput.